

作解脫。未涅槃者。令使涅槃。發是願已。佛便微笑。從其面門。出五色光。繞佛三匝。還從頂入。爾時阿難。前白佛言。如來尊重。不妄有笑。以何因緣。今者微笑。唯願世尊。敷演解說。佛告阿難。汝今見此守園人。不持此一花。散我上者。於未來世。過三阿僧祇劫。當得成佛。號曰花盛。度脫眾生。不可限量。是故笑耳。爾時諸比丘。聞佛所說。歡喜奉行。

## 八、二梵志各諍勝如來緣

佛在舍衛國祇樹給孤獨園。時彼城中。有二梵志。一者深信佛法。常說如來所有功德。三界中尊。最為第一。其第二者。深著邪見。言諸外道六師之徒。亦最第一。無與等者。如是紛紜。遂共諍競。無有休息。乃至上聞。波斯匿王。召二梵志。問其所由。有此諍競。信外道者言。我所奉事富蘭那等。實有神力。殊勝於彼瞿曇沙門。王復問彼信佛者曰。汝今所事瞿曇沙門。有何神力。梵志答曰。我所奉事瞿曇沙門。絕有神力。無有及者。時波斯匿王聞其。二大梵志語已。而告之曰。卿等今者。各自稱譽所奉天神。最為第一。我今為汝到七日。

頭。於平博處。聚集人民百千萬眾。試彼神驗。卿等二人。各自燒香。散花灑水。請汝師等來。此會中。當共供養。時二梵志聞王語已。各相然可。至七日頭。王敕民眾。聚集已訖。時二梵志在大眾前。各發誓願。信富蘭那者。尋取香花并及淨水。在大眾前發大誓願。若我所奉富蘭那等。有神力者。令此香花并及淨水。於虛空中至我師所。令知我心。來赴此會。若無神力。使此香花及以淨水。住而不去。作是誓已。尋散香花并及淨水。皆住不去。即便墮地。時諸大眾見是事已。無有神驗。各相謂言。今富蘭那等實無神力。虛受國中我等供養。作是語已。時信佛者。於大眾前。復取香花及以淨水。散於空中。作是誓言。如來今者實有神力。使此香氣所散諸花及以淨水。至如來所。亦知我心來赴此會。作是誓已。尋即遙散。煙雲垂布。遍覆舍衛。所散諸花。於虛空中。變成花蓋。至如來上。隨佛行住。及以淨水如琉璃。遙灑佛前地。尋即來至。時諸大眾。睹斯變已。歎未曾有。深於佛所。生信敬心。捨不奉事諸外道等。時彼梵志所願既獲。即便以身五體投地。發大誓願。以此香氣散華灑水。所有功德。於未來世。盲冥眾生。為作眼目。無歸依者。為作歸依。無救護者。為作救護。無解脫者。為

作解脫。無安隱者。為作安隱。未涅槃者。使令涅槃。發是願已。佛即微笑。從其面門。出五色光。繞佛三匝。還從頂入。爾時阿難前白佛言。如來尊重。不妄有笑。以何因緣。今者微笑。唯願世尊。敷演解說。佛告阿難。汝今見是彼大梵志。香花淨水供養我。不阿難白言。唯然已見。彼大梵志於未來世。過三阿僧祇劫。當得成佛。號曰不動。度脫眾生。不可限量。是故笑耳。爾時諸比丘聞佛所說。歡喜奉行。

## 九、佛說法度二王出家緣

佛在舍衛國祇樹給孤獨園。爾時有二國王。常共忿諍。多害民眾。晝夜陰謀。無有休息。時波斯匿王觀彼二王。流轉生死。恐難拔濟。於生死中。欲使解脫。往詣佛所。頭面禮足。卻坐一面。白言。世尊。今者如來無上法王。觀諸眾生有苦厄者。為作救護。於鬥諍間。能令和解。今此二王。常共鬥諍。多所傷害。久挾怨讎。不可和解。唯願世尊和彼二王。使不鬥諍。佛即然許。爾時如來於其後日。著衣持鉢。將諸比丘而自圍繞。詣波羅捺國鹿野苑中。時